

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијси савјет*

**Z A K L J U Č A K**  
**o odbacivanju Prijave koncentracije privrednog subjekta Porsche Informatik Gesellschaft  
m.b.H., Louise-Piëch-Straße 9, 5020 Salzburg, Republika Austrija**

**Sarajevo,  
april, 2020. godine**



**Broj: UP-01-26-1-040-10/19**  
**Sarajevo, 23.04.2020. godine**

Konkurencijsko vijeće Bosne i Hercegovine je na osnovu člana 25. stav (1) tačka e), člana 42. stav (2), u vezi sa članom 14. stav (1) Zakona o konkurenciji („Službeni glasnik Bosne i Hercegovine“, broj 48/05, 76/07 i 80/09), rješavajući po Prijavi koncentracije privrednog subjekta Porsche Informatik Gesellschaft m.b.H., Louise-Piëch-Straße 9, 5020 Salzburg, Republika Austrija, podnesenoj po advokatima Ezmani Turković i Džani Smailagić-Hromić iz Marić & Co Advokatskog društva d.o.o., Mehmeda Spahe 26, 71 000 Sarajevo, dana 27.12.2019. godine, pod brojem: UP-01-26-1-040-1/19, na 68. (šezdesetomj) sjednici održanoj dana 23.04.2020. godine, donijelo

### **ZAKLJUČAK**

1. Odbacuje se Prijava koncentracije privrednog subjekta Porsche Informatik Gesellschaft m.b.H., radi nepostojanja obaveze prijave koncentracije u smislu člana 14. stav (1) Zakona o konkurenciji.
2. Obavezuje se privredni subjekat Porsche Informatik Gesellschaft m.b.H. da uplati administrativnu taksu u ukupnom iznosu od 1.000,00 KM (hiljadu konvertibilnih maraka) u korist Budžeta institucija Bosne i Hercegovine.
3. Ovaj Zaključak bit će objavljen u „Službenom glasniku Bosne i Hercegovine“, službenim glasilima entiteta i Brčko distrikta Bosne i Hercegovine.

### **Obrazloženje**

Konkurencijsko vijeće Bosne i Hercegovine (dalje u tekstu: Konkurencijsko vijeće) je dana 27.12.2019. godine, pod brojem: UP-01-26-1-040-1/19, zaprimilo Prijavu koncentracije (dalje u tekstu: Prijava) privrednog subjekta Porsche Informatik Gesellschaft m.b.H., Louise-Piëch-Straße 9, 5020 Salzburg, Republika Austrija (u daljem tekstu: Porsche Informatik ili Podnosilac prijave), koja se tiče sticanja pojedinačne kontrole nad društvom DASOF, trgovsko in stvoritveno podjetje, d.o.o., Ukmarjeva ulica 6, 1000 Ljubljana, Republika Slovenija (u daljem tekstu: Dasof ili Ciljno društvo), podnesenu po advokatima Ezmani Turković i Džani Smailagić-Hromić iz Marić & Co Advokatskog društva d.o.o., Mehmeda Spahe 26, 71 000 Sarajevo.

Konkurencijsko vijeće je dana 08.01.2020. godine, pod brojem: UP-01-26-1-040-2/19 zaprimilo dopunu Prijave od strane Podnosioca prijave.

Uvidom u podnesenu Prijavu, Konkurencijsko vijeće je utvrdilo da ista nije kompletna i uredna sukladno odredbama Zakona o konkurenciji („Službeni glasnik BiH“, br. 48/05, 76/07 i 80/09) (u daljem tekstu: Zakon), te odredbama Odluke o načinu podnošenja prijave i kriterijima za ocjenu koncentracija privrednih subjekata („Službeni glasnik BiH“, br. 34/10) (u daljem tekstu: Odluka o načinu podnošenja prijave i kriterijima za ocjenu koncentracija privrednih subjekata), pa je Podnosiocu prijave uputilo zahtjev za dopunu Prijave broj: UP-01-26-1-040-3/19 od dana 21.01.2020. godine.

Podnosilac prijave je podneskom zaprimljenim pod brojem: UP-01-26-1-040-4/19 od dana 30.01.2020. godine dostavio tražene podatke.

Konkurencijsko vijeće je dana 05.02.2020. godine, pod brojem: UP-01-26-1-040-5/19 zaprimilo podnesak Podnosioca prijave u kojem je korigovao procjenu tržišnih udjela učesnika na tržištu pružanja lizing usluga u Bosni i Hercegovini za 2018. godinu.

Konkurencijsko vijeće je dana 19.02.2020. godine, pod brojem: UP-01-26-1-040-6/19 uputilo zahtjev za dopunu Prijave koncentracije, na osnovu kojeg je Podnosilac prijave dostavio podesak broj: UP-01-26-1-040-7/19 kojim je dostavio tražene podatke.

Podnosilac prijave je naveo da je zahtjev za ocjenu koncentracije podnio osim u Bosni i Hercegovini i nadležnim tijelima u Republici Srbiji, Republici Crnoj Gori, Republici Kolumbiji, Republici Albaniji, te da će naknadno podnijeti zahtjev za ocjenu koncentracije u Sjevernoj Makedoniji.

Konkurencijsko vijeće je u smislu člana 30. stav (3) Zakona, izdalo Potvrdu o kompletnoj i urednoj prijavi broj: UP-01-26-1-040-8/19 dana 22.04.2020. godine.

Iz podnesene Prijave moguće je utvrditi sljedeće činjenice:

Prijava je je podnesena, u smislu člana 16. stav (1) Zakona, a pravni osnov Prijave je Ugovor o prenosu udjela sklopljen 12.12.2019. godine između privrednog subjekta Porsche Informatik i fizičkih lica Damijena Kavera, (..)\*\*<sup>1</sup>, Ljubljana, Slovenija i Andreja Pečnika, (..)\*\*<sup>1</sup>, Slovenija.

### ***1. Učesnici koncentracije***

Učesnici predmetne koncentracije su privredni subjekti Porsche Informatik Gesellschaft m.b.H., Louise-Piëch-Straße 9, 5020 Salzburg, Republika Austrija i DASOF, trgovsko in stvoritveno podjetje, d.o.o., Ukmarjeva ulica 6, 1000 Ljubljana, Republika Slovenija.

#### ***1.1. Privredni subjekt Porsche Informatik***

Privredni subjekt Porsche Informatik je registrovan u Registru poduzeća Pokrajinskog suda u Salzburgu, pod matičnim brojem upisa: FN 72830 d. Privredni subjekt Porsche Informatik je direktno povezano društvo privrednog subjekta Porsche Holding Salzburg (u daljem tekstu: Porsche Holding) i član je Volkswagen Grupe (u daljem tekstu: VW Grupa). Privredni subjekt Porsche Holding je direktno povezano društvo VW Grupe.

Pretežne registrovane djelatnosti privrednog subjekta Porsche Informatik su pružanje usluga: digitalnih rješenja korisnicima, digitalnih maloprodajnih rješenja, digitalnih rješenja u veleprodaji, digitalnih finansijskih rješenja, rješenja u oblasti računovodstva, kontrolinga i ljudskih resursa.

Privredni subjekt Porsche Informatik pruža digitalna rješenja korisnicima kroz online platformu za pretragu vozila Car Configurator koja prikuplja željena vozila za potencijalne kupce. Platforma Car Configurator omogućava da se slika vozila i cjenovna kalkulacija istovremeno adaptiraju svakom promjenom željene opreme, boje, unutrašnjosti, itd. Nakon što korisnik napravi željenu konfiguraciju vozila, platforma Car Configurator mu omogućava da zatraži ponude za lizing i osiguranje vozila. Car Configurator je integrisan na web stranice brendova vozila VW Grupe i web stranice distributera njihovog brenda. Također, privredni subjekt Porsche Informatik ima platformu New Stock Vehicles koju korisnici koriste da traže vozila uvoznika i distributera Volkswagena, Volkswagen komercijalnih vozila, Audi, Seat i Škoda brendova. Podnosilac prijave ujedno nudi i carLog, multi-brend portal koji sadrži pregled podataka i aplikacija za korisnike automobila, kao i online pregled korištenih vozila

---

<sup>1</sup> (..)\*\* - Podaci predstavljaju poslovnu tajnu, u smislu člana 38. Zakona o konkurenciji.

DasWeltAuto gdje distributeri vozila koje proizvodi VW Grupa nude širok asortiman testiranih, održanih i popravljenih vozila.

U okviru pružanja usluga digitalnih maloprodajnih rješenja, privredni subjekat Porsche Informatik posjeduje integrativnu platformu za privredne subjekte koji pružaju usluge maloprodaje brendova automobila iz VW Grupe CROSS 2. CROSS 2 sistem podržava sve distributere automobila u prodaji, uslugama i rezervnim dijelovima. Nadalje, privredni subjekat Porsche Informatik nudi maloprodajnim privrednim društvima podršku u svim fazama prodaje kroz kompletno integrisan CROSS 2 Dealer Management System.

Podnosilac prijave pruža usluge putem aplikacije Mobile Service Reception koja se može koristiti na tablet računarima i koja u kombinaciji sa aplikacijom CROSS podržava procese prijema vozila prilikom servisa.

U okviru segmenta digitalnih rješenja u veleprodaji, privredni subjekat Porsche Informatik pruža rješenja za digitalnu obradu novih vozila, putem aplikacije Carlos, koja služi da objedini sve procese oko novih vozila u centralnom sistemu uvoznika. Što se tiče logističke podrške, Porsche Informatik implementira narudžbe i isporuke koje se tiču obrade rezervnih dijelova sa fokusom na kupce preko ETN logističkog sistema, preko koga podržava cjelokupni proces isporuke dijelova od distributivnog centra za dijelove do distributera/uvoznika za partnerske zemlje.

Aktivnosti u digitalnim finansijskim uslugama obuhvataju integrisanu IT platformu Car Fin za finansijske i usluge osiguranja Porsche Holdinga, kao i aplikaciju za konfiguraciju vozila Fleet Car Configurator za velike klijente Porsche Banke koja omogućava vozačima kompanijskih vozila ovih kompanija da se prijave u sistem, online konfiguriraju novo željeno vozilo i da zahtijevaju ponudu za finansiranje od strane Porsche Banke.

Privredni subjekat Porsche Informatik pruža različite računovodstvene i kancelarijske usluge, integrišući rješenja za finansijsku kontrolu i fakturisanje, kao i inovativne usluge razvoja softvera projektnog menadžmenta i konsaltinga, usluge hostinga i podrške.

VW Grupa je aktivna u razvoju, proizvodnji, reklamiranju i prodaji putničkih automobila, lakih komercijalnih vozila, kamiona, autobusa, šasija za autobuse i dizel motora, uključujući rezervne dijelove i dodatnu opremu za sve navedene kategorije vozila. VW Grupa je također aktivna u distribuciji vozila.

VW Grupa obuhvata slijedeće brendove: Volkswagen putničke automobile, Volkswagen laka komercijalna vozila, Porsche, Audi, Škoda, Bentley, Bugatti, Lamborghini, SEAT, MAN, Scania i Ducati. VW Grupa je nedavno uspostavila i brend MOIA, koji će biti aktivan u razvoju i reklamiranju usluga mobilnosti, kao što su „ride hailing“ i „car sharing“.

VW Grupa dodatno pruža i finansijske i osiguravajuće usluge prvenstveno u vezi sa distribucijom i finansiranjem svojih automobila i komercijalnih vozila. Pomenuta aktivnost se obavlja pretežno kroz Volkswagen Financial Services AG i njegova povezana društva.

Privredni subjekat VW Grupa ostvaruje učešće u vlasničkoj strukturi kapitala sljedećih privrednih subjekata (povezana privredna društva) koja se nalaze u Bosni i Hercegovini:

(..)\*\*.

### ***1.2. Privredni subjekat Dasof***

Privredni subjekat Dasof je društvo ograničene odgovornosti upisano u Poslovni registar Republike Slovenije pod matičnim brojem upisa: 5670519000 u vlasništvu dva fizička lica Damijena Kavera,

(..)\*\*, Ljubljana, Slovenija i Andreja Pečnika, (..)\*\*, Slovenija sa po 42,5% udjela u vlasničkoj strukturi, dok je preostalih (..)\*\*% sopstveni udjel privrednog subjekta Dasof.

Pretežne registrovane djelatnosti privrednog subjekta Dasof su pružanje usluga vezanih za informacionu tehnologiju, odnosno razvoj sortverskih rješenja za lizing i konsalting. Ciljno društvo razvija standardni softver za aplikaciju imena Dasof koja uključuje „Dasof SQL Leasing“ sa svim Core i Web modulima. Softversko rješenje koje je kreirao privredni subjekt Dasof koristi Porsche Bank kao povezano društvo VW Grupe.

Privredni subjekt Dasof (..)\*\*.

## **2. Pravni osnov i pravni oblik koncentracije**

Pravni osnov koncentracije je Ugovor o prenosu udjela sklopljen 12.12.2019. godine (u daljem tekstu: Ugovor) između privrednog subjekta Porsche Informatik i fizičkih lica Damijena Kavera, (..)\*\*, Ljubljana, Slovenija i Andreja Pečnika, (..)\*\*, Slovenija.

Prije provođenja transakcije, fizička lica Damijen Kavera i Andrej Pečnik imaju po (..)\*\*% udjela u vlasničkoj strukturi, dok je preostalih (..)\*\*% sopstveni udjel Ciljnog društva. Nakon provođenja transakcije, privredni subjekt Porsche Informatik će steći (..)\*\*% udjela u Ciljnom društvu, te će imati potpunu kontrolu nad istim.

U skladu sa članom 12. stav (1) tačka b) pod 1) Zakona, pravni oblik predmetne koncentracije sticanje kontrole jednog, nad drugim privrednim subjektom, kupovinom udjela u osnovnom kapitalu.

## **3. Pravni okvir ocjene koncentracije**

Konkurencijsko vijeće je u postupku ocjene Prijave primijenilo odredbe Zakona i Odluke o načinu podnošenja prijave i kriterijima za ocjenu koncentracija privrednih subjekata, te Odluku o utvrđivanju relevantnog tržišta („Službeni glasnik BiH“, broj 18/06 i 34/10) (u daljem tekstu: Odluka o utvrđivanju relevantnog tržišta).

## **4. Relevantno tržište predmetne koncentracije**

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište u proizvodnom smislu obuhvaća sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu posebno njihove bitne osobine, kvalitet, uobičajenu namjenu, način upotrebe, uslove prodaje i cijene.

Nadalje prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cjelokupnu ili dio teritorije Bosne i Hercegovine na kojoj privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Uzimajući u obzir pretežnu djelatnost Ciljnog društva u Bosni i Hercegovini i tržište na kojim će koncentracija imati efekte, te činjenicu da na horizontalnom nivou ne postoji preklapanje u djelatnostima učesnika koncentracije, relevantno tržište predmetne koncentracije je tržište kompjuterskog programiranja, konsultantskih i drugih usluga.

Na osnovu djelovanja učesnika koncentracije, relevantnim tržištem predmetne koncentracije u geografskom smislu je utvrđeno područje Bosne i Hercegovine.

Slijedom iznesenog relevantno tržište predmetne koncentracije je tržište kompjuterskog programiranja, konsultantskih i drugih usluga u Bosni i Hercegovini.

#### 4.1. Analiza relevantnog tržišta predmetne koncentracije

Učesnici koncentracije i glavni konkurenti na tržištu kompjuterskog programiranja, konsultantskih i drugih usluga u Bosni i Hercegovini u 2018. godini su imali sljedeće tržišne udjele:

Tabela 1.

R.br	Privredni subjekt	Tržišni udio (%)
1.	BH Telecom Solutions d.o.o.	(..)**
2.	Microsoft Bosna i Hercegovina	(..)**
3.	ABC TECH Group Sarajevo	(..)**
4.	<b>Dasof</b>	(..)**
5.	<b>Porshe Informatik</b>	(..)**
6.	Ostali	(..)**
Ukupno		100
<b>Ukupno (4+5)</b>		(..)**

Izvor: podaci iz Prijave (procjena Podnosioca prijave)

Na osnovu podataka (Tabela 1.) privredni subjekt Dasof je u 2018. godini, na relevantnom tržištu kompjuterskog programiranja, konsultantskih i drugih usluga u Bosni i Hercegovini imao udio od (..)\*\*%, dok privredni subjekt Porshe Informatik nije bio prisutan na datom relevantnom tržištu, te je njegov tržišni udio (..)\*\*%.

#### 5. Ocjena prijave koncentracije

Obaveza prijave koncentracije nastaje, u smislu odredbe člana 14. stav (1) Zakona, kada učesnici koncentracije prodajom roba i/ili usluga ostvare na svjetskom tržištu 100.000.000,00 KM po završnom računu u godini koja je prethodila koncentraciji, i kada ukupni godišnji prihodi svakog od najmanje dva privredna subjekta učesnika koncentracije ostvareni prodajom roba i/ili usluga na tržištu Bosne i Hercegovine iznose najmanje 8.000.000,00 KM po završnom računu u godini koja je prethodila koncentraciji, ili ako je njihov zajednički udio na relevantnom tržištu veći od 40,0%.

Godišnji prihodi učesnika koncentracije (Tabela 2.) predstavljaju ukupne prihode (bez poreza na dodatnu vrijednost i drugih poreza koji se direktno odnose na učesnike koncentracije na tržištu Bosne i Hercegovine, u smislu člana 9. tačka h) Odluke o načinu podnošenja prijave i kriterijima za ocjenu koncentracija privrednih subjekata.

Ukupni godišnji prihodi privrednih subjekata učesnika predmetne koncentracije za 2018. godinu:

Tabela 2.

KM	VW Grupa	Dasof
Svijet	(..)**	(..)**
Bosna i Hercegovina	(..)**	(..)**

Izvor: podaci iz Prijave, \*obuhvata prihod od 01.01.-31.12.2018. godine

Privredni subjekt Dasof je naveo da nema registrovana povezana društva u Bosni i Hercegovini, te da je prihod na tržištu Bosne i Hercegovine ostvario prodajom softvera za poslovne aplikacije nezavisnim privrednim subjektima i to: (..)\*\*.

Konkurencijsko vijeće je utvrdilo (Tabela 2.) da su učesnici predmetne koncentracije ispunili uslov ukupnog godišnjeg prihoda na svjetskom tržištu, u smislu člana 14. stav (1) tačka a) Zakona, ali nisu ispunili uslov ukupnog godišnjeg prihoda na tržištu Bosne i Hercegovine, u smislu člana 14. stav (1) tačka b) Zakona.

Također, učesnici koncentracije nisu ispunili niti uslov tržišnog udjela jer njihov zajednički tržišni udio na relevantnom tržištu nije veći od 40,0% (Tabela 1.), u smislu člana 14. stav (1) tačka b) Zakona.

Na osnovu naprijed navedenog, utvrđeno je da učesnici koncentracije nisu bili u obavezi podnijeti Prijavu, jer nisu kumulativno ispunjeni uslovi iz člana 14. stav (1) tačka a) i b) Zakona, te je odlučeno kao u dispozitivu.

#### **5. Administrativna taksa**

Podnosilac prijave na ovaj Zaključak, u skladu sa članom 2. Tarifni broj 108. tačka c) Odluke o visini administrativnih такси u vezi sa procesnim radnjama pred Konkurencijskim vijećem („Službeni glasnik Bosne i Hercegovine“, broj 30/06, 18/11 i 75/18) dužan je platiti administrativnu taksu u ukupnom iznosu od 1.000,00 KM u korist Budžeta institucija Bosne i Hercegovine.

#### **6. Pouka o pravnom lijeku**

Protiv ovoga Zaključka nije dozvoljena žalba.

Nezadovoljna strana može pokrenuti upravni spor pred sudom Bosne i Hercegovine u roku od 30 dana od dana prijema, odnosno objave ovog Zaključka.

**Predsjednica**

**mr. Arijana Regoda-Dražić**